

## Medina (10 onns) da Casiguran

Medina Mendoza va ella tschunavla classa e s'auda tiel pievel dils Agtas ch'era in dils emprems pievels sillas Filipinas.

Sco las biaras cuminonzas indigenas sillas Filipinas ein els per ordinari paupers e buc aschi scolai. Sia famiglia viva en ina casa falombra sin ina surfatscha da circa 16 meters quadrats. Mo ina vart dalla casa ha ina preit da stuors d'itschal ed aissas. Las treis autras varts han mo ina rama da lenn.

Tut ils quater confamigliars dierman ensemen ella part alzada ora dalla casa sin plantschiu da bambus ella grondezia d'in letg dubel. Il rest dalla casa ha negin plantschiu, mobein stat silla tiara. Medina habitescha leu ensemen cun sia mumma e sias duas soras. Lur bab ei morts avon entgins onn pervia da cancer dil lom e la feglia veglia lavura gia sco fumitgasa a Manila.

Mo Medina e las autras Agtas vivan a Casiguran e paran dad esser cuntentas cun quei ch'ellas han.

Sia mumma Helen, la suletta nutridra dil tenercasa, lavura sco lavunza per la glied pli beinstonta dil vitg. Tut tenor stagiun gida Helen era tier il puesser vischinont a zerclar e raccoltar. Aschia sa ella migliurar empau las entradas dil tenercasa.

En quei tenercasa partan ins bunamein tut – il liug da durmir e schizun il savun; ei dat pia strusch spazi privat.

Perquei che sia mumma lavuras biaras uras segidan ils affons el tenercasa. Cun quei ch'ellas ein tuttas mattatschas gaudan ellas buca il luxus da far mo las lavurs da mattatschas.

„Jeu gidel a schubergiar la casa, fetschel uorden el contuorn e mettel ensemen resti che mia mumma ha lavau. Jeu mon per aua alla fontauna e per lenna da scaldar egl uaul, lavel giu vischala, cuschinel ris e mirel dil curtgin“, di Medina.

„Sche nus havein nuot da far en casa dein nus basket, volley ni fagein da pegliar tenor la poesia d'affons da ‚London Bridge is falling down‘. Ni che nus fagein batuangbola, bubuka ang bulaklak, lalalale ni che nus mein a senudar el flum.“

Medina sa buca seregurdar cu ils dretgs d'affons ein vegni discutai la davosa gada en scola. Leilei, sia sora veglia (14 onns), manegia ch'ei seigi stau ella quarta classa.

Medina ha cun far termagls cun sias soras ni el vitg mai sentiu disavantatgs perquei ch'ella ei ina mattatscha. „Nus fagein termagls culs buobs e mintgaton lain els gudignar nus“, tarlischa ella plein quiet.

Era ella scola integrada Tinib Calanguasan, nua ch'ella e sia sora veglia van a scola, ha ella mai giu disavantatgs pervia da sia provenientscha. Ellas fan termagls cun tut lur conscolaras e lur conscolars, era quels ch'ei buca Agtas. Quei era aunc auter dil temps da ses geniturs.

Medina di ch'ella vegli daventar in di polizista. Silla damonda suenter il motiv rispunda ella: „Jeu vi gidar mia famiglia.“ Ella ha apparentamein enderschiu ch'il president actual Rodrigo Duterte ha alzau las pagas da la polizia ed il militar.